

蘄水縣志卷之十

知蘄水縣事多祺纂輯

人物志

宦蹟

仕宦者恒情之所歆羨而君子若弗克勝焉始也患志之弗立既也慮業之不成志與業副而時或弗遇遇矣位卑則卓卓居高則汶汶臨大節而不奪告成功而不施繫何人哉蘄自宋元以迄於今士之顯當途而傳後世者人各表見然或紀自裨官而闕於正史或志於外方而逸於本地其傳不傳正不易易也合而志之君子曰可以觀矣

南唐

陳起舉進士爲黃梅令時妖人諸祐自言能使貧者富富者貧里民效之積粟數百夜行晝息取資於盜起蒞任數日籍祐爲里長不服且媢言曰吾取令頭殺豎子耳起聞執祐斬之由是知名遷監察御史

宋

李禹卿字君益通判蘄州隄太湖八十里爲渠以益漕

運蓄水溉田千餘頃歲饑出資粟二萬全活萬餘人
復以棘寺丞出守潼川廉明多善政惠商通工市貨
百物克勑而禹鄉之廉民間爲之謠曰止飲潼江一
口水其子年十二偶出遊人知爲太守子各餽獻有
加子揮之去曰吾家不慣受人物其家教清嚴如此

採蘇州邗
州名宦志

明

楊思義魁梧奇偉有幹才太祖稱吳王以薦舉授起居
注初錢穀隸中書省吳元年始設司農卿以思義爲

蘄水縣志

卷之十

宦蹟

二

之明年設六部改爲戶部尙書大亂之後人多廢業
思義請令民間皆植桑麻四年始徵其稅不種者罰
如周官里布法詔可又請令天下立預備倉以防水
旱凡所興設經畫詳密時稱其能調陝西行省叅政
卒於官

見明史按本傳云不詳其籍里今據省郡邑
志選舉表皆注蘄水年代官爵悉與史合而

邑之黃草湖
尙有其墓

戴綸字興邦英邁方正篤於孝友領洪武庚午鄉薦任
監察御史出按山東風裁凜凜以糾劾忤時貴謫梧
州通判再謫庫官尋改監倉糧歷官以清忠自持時

貴欲致之死以無隙而止

見分省人物攷

黃紹祖洪武中貢入胄監陟刑部侍郎楚紀謂其老成

有才

見郡志

薛均徵子生時徵夢人投萬鈞懷中名萬鈞後更均治五經補博士弟子性峻潔清苦敦孝誼洪武中以懷才舉上十策高帝異之會其母疾危固請放歸明年以均同知泰州除知合州治行第一文皇召爲太僕寺卿丁內艱歸起應天府尹買舍旁片地種菜嘗自芸之帝廉得其狀笑曰人皆樂惟朕與均獨苦也頃

蘄水縣志

卷之十

宦蹟

三

之乞歸年七十特進禮部侍郎均性峭直不容人小過僚友仗之比歸或疑其歸裝頗重於途中發之惟紙馬板一具詰之故曰無他物遺子孫令業此當有以活矣歸剪茅構廬僅蔽風日當事造均匿不出晚號隱林野老作望雲圖爲詩輒泣下文皇知其貧命有司賜官湖頃餘後人因名欽賜湖又曰薛家湖子孫世守之兼鬻紙馬至今巴河有薛紙馬之號萬厯中邑令閻士選冠帶其子孫匾其閭曰清白世家戶諫官應震復爲之請諡

按均爲邑之巴河人至今父老猶能述其清苦所居地曰神馬嶺卽所謂紙馬之號也以高帝之奇其才文皇之知其節邑令之敬禮世裔諫垣之請復易名是其居官之品足式矣而正史闕之何也昔左氏逸程嬰杵臼之事歐陽氏不爲韓通立傳修史者誠有待於拾遺補闕也

吳永喆字克明正統辛酉舉人博通羣籍事母以孝聞

授南川諭誘誨人士若不及貧者賙給之學士江朝

宗方伯蔣雲漢都御史蔣泰俱出其門尋拜河南道

御史蜀士至今道吳先生舊志

范煥字五雲由天順監生在建陽令禮賢重儒術廣設

義學以迪蒙士在任省賦清刑百姓不見科斂追呼

新水縣志

卷之十

宦蹟

四

之擾尋行取赴京士民泣送壅塞道左建陽名宦志

張存禮字秉周由成化間天文辟舉授德慶州牧州有

沉獄屢更州牧未得決存禮下車立爲剖雪歲旱累

年禱雨濟民又教民修輓轡水車之具農實利之他

如建學興士修理關梁善政班班致仕歸敦尙睦婣

宗族稱之正言飭行鄉里式焉卒祀鄉賢

魯永清字端本成化辛丑進士爲大理評事執法不阿

有諸生犯辟秋曹欲貸之永清執不可同時學士李

東陽宗伯程敏政皆敬重之出知成都府遇旱糴粟

四萬餘石以賑之府故無預備乃置倉廩廣儲粟明年又饑年用不困老幼相慰曰吾等不即填溝壑太守之力也安縣賦烏集萬餘永清往善論之賦皆散去又設八釜於公門外合訟者就爨立與判決而歸民間有魯不解擔之謠歷官江西左參政後從祀鄉賢 通志

徐紹先字繼之成化丁未進士正德中知銅仁府時鎮苗作亂紹先繕城堡備芻粟治器械練民兵苗聞而憚之不敢犯境 貴州名宦志

徐吉貞字天相洪治戊午舉人守忠州催科不擾條陳十事深切時艱蜀巨寇麻鶴兒文千戶暴橫里中百姓惶懼吉貞計除之生平居官以清嚴律已以真實愛民嘗書二語以自警曰天地生人隨分足朝廷命我爲民來歷官南京戶部郎中乞歸後從祀四川名宦孫步雲字望之由舉人令祿豐豐衝且疲一切撙節愛養鋤奸宄緝巨寇毅然無所迴避邑人頌德不衰 舊志

田重器字國用宏治甲子舉人本姓錢早孤事母兄極

孝謹兄卒多子割產益之晚年與子貢同舉於鄉正
德中知江津舊志作永川今從四川志通興廢舉缺時有巨惡害
民前令莫敢如何重器置之法民賴以安子貢字少
江由舉人授嘉興府判陞絳州牧絳多宗室貢執法
不頗宗人主事來州放糧有混領銀一封者主事語
貢夜令人款其門曰州中有事相喚其人卽持銀出
曰將送來矣其見憚如此宗室中有文哥武哥貧不
能婚貢助之婚陞廉州府丞調杭州厯著循聲尋罷
歸惟圖書數卷而已貢子邦僈另傳 舊志

李宗元字東臯汝子正德庚午舉人除沈邱令邑當初
建百務草創宗元廉以律已嚴以御下茸學宮蠲逋
稅弭盜革姦鉅細畢舉臺檄有不便民者輒封還之
詳理沈畧凡六年遂爲壯邑刻沈邱志考治行居河
南第一祀名宦後祀鄉賢 通志

玉中正正德時歲貢令都昌性方毅有潔操用止薪水
邑有白水束薪之謠三年堅志告歸鄉間有利病必
爲長吏白之子承芳另傳 志舊

陳欽字石岑正德己卯舉人授新野令居官有廉聲蠲

俸積粟活饑民萬餘百姓禱頌上聞擢大理評事年
餘致仕 舊志

李延芳字叔慶正德間歲貢師從祖汰會與湛若水講
學湛書隨處體認天理六字付之爲大足縣訓導操
履純正言笑不苟勤課校寒暑不少輟士賴薰淑諸
生貧者捐俸助給勿計歲祿道殍相望力爲揜之陞
汶州教諭致仕疾劇值父忌辰索衣冠強起力不支
伏枕痛哭而卒祀四川名宦後從祀鄉賢 舊志

周瑯字光載正德庚辰進士幼時相者竒之稍長益嗜

蘄水縣志

卷之十

宦蹟

七

古工著作於書無不讀而尤癖左氏與同年張治廖
道南齊名廷試時咸以狀頭期之乃以卷壞列二甲
補省垣陟都諫以論列抗直出守廬州守廬務爲惠
愛有廉聲搜緝郡人包孝肅拯奏議序而梓之尋兵
備山東轉督學嶺南率先行誼專經術一洗鉛槧浮
淫之蠹士以故彬彬多出其門然規範嚴肅從無有
干以私者卒於官從祀鄉賢初之官嶺南難與母別
作嬰兒泣有依依慈母念千里憶相同之句著有韻
洞集春秋補傳後燬於兵火 參郡志

胡仲謨字啟忠正德庚辰進士授遂安令沉毅樸訥臨事不苟不以詞色假人姦良立辨豪猾斂跡民皆樂

業累官雲南按察使司後祀鄉賢

浙江嚴州名宦志

李猷字顯之嘉靖己酉舉人授射洪令禦強寇使不入境劄城築隄屹然保障守甯州禦寇馭邊以誠動物陞甯國丞協恭佐治太守倚之五十致仕宦橐蕭然事兄極盡友恭之禮不以老倦以恩晉中憲大夫卒年八十有四

舊志

朱祗字汝衷嘉靖癸丑進士由行人擢南御史飭監守

蘄水縣志

卷之十

宦蹟

八

緝盜令市肆平價官吏守法出守常州府當兵燹後俗靡凋敝吏民爲姦祗剔蠹去舊俗而新之擢陝西副使值西羌跳梁乃城金川選精騎千餘自持短兵勁其後賊盡駭散擢雲南叅政有銀場官吏乾沒則嫁禍齊民祗廉得其實置乾沒者於法而嫁禍悉解陞浙江按察又陞雲南右布政以艱歸服闋起浙江右布政未幾以老去送者萬計至毘陵猶弗止卒祀鄉賢子期至期昌見文苑

錢邦傅嘉靖癸丑進士知臨安府慈恕得民除一切陋

例尋常詞訟爲之勸息歲儉設粥救饑捐俸完民逋稅陞苑馬卿去後民歌誦之

雲南名宦志

按舊志那爾先人於洪武初由荊州避難來蘄改姓山凡五世至嘉靖辛卯始請於朝復錢姓

周鳴埧字思友嘉靖己未進士授餘姚令姚以倭後徭役最苦鳴埧下令丈田田覈籍定按籍雇券公私便之有官湖爲豪貴竊據核令還官歲得溉田數千頃分校鄉闈王者索所私卷堅執不與陞兵部武選主事邑人肖像龍山以祀累官廣東叅議時山海皆寇正集兵掃蕩而解調報至遂掛冠歸三十年絕足不

蘄水縣志

卷之十

宦蹟

九

入城市律已行事動與禮準後從祀鄉賢著春秋旨及詩文若干卷

叅郡志

李畿嗣字民欽嘉靖壬戌進士除廣信推官庇平民忤權相爲營繕主事督乾清宮工世宗親賜食卒爲嚴嵩中傷左遷漳州同知署郡半載案牘盈几片言立折數平海寇漳人德之祀名宦歷南刑兵二部卽出知惠州惠故蘓軾寓作寓惠錄先是沙田陸梁民人逃散畿嗣勤招徠縱反間擒賊首流移盡復時嶺南方有事羅旁羅與肇慶相接延袤數千里剽掠不可

制當事調畿嗣爲肇慶守畿嗣設方畧大破之盡平
羅旁東西山升瀧水爲直隸羅定州置東安西甯二
縣隸焉捷聞遷監軍副使卒於官後從祀鄉賢子生

采另傳

叅福建志

王希元字白岳隆慶辛未進士初任南太常博士序禮
典樂多所建明南有富商妾生遺腹子嫡子利其貲
逐之歷訟不決訴之希元嫡子又以千金賄進希元
直諭嫡自認弟均其財並取賄金給妾子南人頌之
旋擢吏科都給事時以議兩宮朝禮忤權貴出鎮滇
南之金滄旋陞福建提學轉江西叅政因御窰作淫
巧器難成糜費浚民希元疏罷之與代巡者不合累
疏乞歸卒於家祀鄉賢

蕪水縣志

卷之十

宦蹟

十

徐一唯字心溪隆慶辛未進士授萬載令沉毅果決置
學田以贍師生定瀏陽濠戶爭廣洞田地之亂擣大
圍山巨寇李大鑿等民賴以安擢南戶部主事改遷
北吏部郎歷延平潮州守陞廣東副使轉兩淮鹽運

使致仕

江西袁州名宦志

易之貞字忠甫隆慶庚午舉人署清浦教諭以廉勤擢

戶部郎中督餉易州奏免積逋二十萬行部至良鄉
潤通糧故官爲請減十之九且捐俸代償之奏罷礦

瑞王虎卒爲忌者所中出守馬湖三月歸

通志按之
貞本舉人

通志作
進士誤

胡仲合字啟賁生甫七月失怙旣長善承母教苦心下

帷中隆慶庚午鄉試初令廣昌時方苦丈量之役賴
力請於上憲得免改判通州捐俸疏所屬運道官民
稱兩便當道由是嘉其才陞大理府推官折獄平允
改組後置祭產立義租新祠宇族人至今誦之壽六

蕪水縣志

卷之十

宦蹟

十

十有二

何鳳起字近洙萬歷甲戌進士授葉縣令每聽訟不爲

高深聽民從容自理素精鍼灸諸穴法見訟者病卽
治之不曲事上官張居正子懋修北上所過餽遺鳳
獨贈疏布居正聞而驚曰此必清操令也適罷職居

正言於朝卽日遷知廣德州三年以母艱歸十年不
仕云親已就木無事祿養後復徵起仍補廣德州人
望如慈父母歷刑部郎轉雲南按察副使未赴任卒

於京邸

舊志

蔡斗移萬歷丁丑進士由刑部郎出守臨江府知府以正率屬以惠字民陞長蘆鹽運使冰蘖自矢課賦無私商民頌之致仕歸從祀鄉賢

徐存德字恒庵步雲少子萬歷丙戌進士自少卽落落著手采無阿徇態初授安仁令安仁小邑人易之存德矢志振勵與巖邑等邑大治改仁和縉紳持政俗刁健存德絕遠權勢毅然與之更始有座師使人致書邑卽有囑使爲之干請者存德却其請而厚贖遣之乃訊其事使人猶復懇恩遂答而逐之歲歉且疫

蘄水縣志

卷之十

宦蹟

十一

捐俸買粟賑饑者安集禳救民呼活命官而邑又大治奏最推南戶部主事卽乞歸存德六齡卽孤自念鮮民三釜不逮黜然傷懷遂用投紱也歸後唯理祠宇祀產家譜數切要事餘則放懷山水而已

續志

閔廷甲字翼墟萬歷己丑進士常州府推官以敏練稱嘗自言始至時誤斷一獄至今悔不能已自茲以往或可告無罪於民矣擢吏部郎中時廷臣諍建儲事忤旨戶諫孟養浩被杖廷甲坐與養浩善左遷南工部屈三十年陟通政司布衣疏食以清白聞從祀鄉

賢參江南名宦志

萬良儒字楚東萬歷間歲貢為祈門訓導與諸生約曰朝廷因官命名因名立義予惟以忠信立辭貞廉律身求盡訓導二字之義有諸生兄弟爭產召至各諭以古兄弟友愛之道猶未釋又召兩家師諭以匡正務以誠動兩人慚遂棄萬金而式好如初舊志

陳秉厚字載甫萬歷甲午舉人授常山令蒞任數月謳歌載道旱魃為虐步禱祈雨疾癘為災散藥救疾歷任甯國府丞尊鱸興思兩袖清風後以覃恩晉階知

蕪水縣志

卷之十

宦蹟

三

府舊志

張文光字公瑾萬歷戊戌進士授檢討以論楚藩華燿事忤沈一貫謫光山丞久之遷尚寶丞每慷慨陳言述古今法戒修身講學之要尋遷少卿官至國子司

業通志

按文光本邑人其鄉會中式郡邑舊志班班可攷其後遷江夏省志因入江夏今應改歸本籍再舊志載國子司業省志官止少卿存攷

官應震字暘谷其先黃岡人萬歷戊戌進士初令南陽再補濰令有因忿殺人當辟者應震曰此非盜比而

先絕祀殊不忍爲別室獄中令本婦入宿廷訊下值
鰥夫怨女可婚者卽諭婚之三年舉循良第一召爲
戶科給事於人才消長東宮國本禮儀奢儉宦豎明
黨無不陳說諫垣九年前後二百餘疏皆碩畫神宗
嘗以敢言稱之光宗卽位遷太常少卿尋乞歸天啟
間屢召以魏闖當事不起崇禎朝數問應震爲忌者
所格卒年六十八所著疏稿二十餘卷宛澠政紀十
卷俱燬於兵從祀鄉賢子四撫辰撫邦撫極撫渙另
傳舊志

蘄水縣志

卷之十

宦蹟

十四

金玉節字雅初萬歷戊戌進士授長興令遇事勇於有
爲禮賢下士貧不能婚者捐俸助之值礦使爲邑厲
玉節繩以法卒不敢肆歲當編審立走區走田法通
融均攤詭寄無所容民稱便焉見湖州名宦後累官
比部卽從祀鄉賢子甌另傳

周應期字際明萬歷辛丑進士授行人司奉命冊封豫
章益王擢御史按嶺南執法如山有神明之頌先是
應期祖瑯督學嶺南得士望齊山斗及應期至粵人
慕如考妣同祀名宦後祀鄉賢著有易解續志

周延光字斗垣萬歷辛丑進士知金華府政靜民和晉
副使提督浙學春秋兩闈元魁皆所拔士如曹勳袁
儼皆是隨陞浙左布政收筦關支躬自閱視主臧吏
抱贖記出納而已宿弊一清

浙江金華
名宦志

歸里允符鄉

論立賢大夫祠於雲路口祀之後祀鄉賢

游之英萬歷丙午舉人令麗水催科不擾值歲歉力請
開預備倉以賑且施粥六門食之學宮傾圮捐金爲
倡他祠廟堰埠歲久坍塌多加修葺民苦旱步禱雨
降虎傷人籲神械至人謂精誠所感云

見浙江
名宦志

蕪水縣志

卷之十

宦蹟

五

蔡國琦字廷玉性友愛端方萬歷中由太學生任壽光
主簿署縣事二載餘歲歉賑饑民更爲勸賑歌以示
大家存活甚衆至今稱之歿祀鄉賢

舊志孝友
今改入

謝天申字元菴萬歷戊午舉人授西甯令居躬嚴潔治
尚禮教政美人和梟獍爲空捐俸創典學書院進人
士面課之士因咸奮於學

見廣東
名宦志

畢九臣字恒甯天啟甲子舉人授儀瀧令初儀被流寇
焚屠畧盡城皆圯壞至則招集流遺捐貲堅築又募
鄉勇分營教戰寇不復闌入歷四載遷紹興府丞上

官知其才多所倚任凡兩署郡守四攝邑令俱稱最
越中倪元璐劉宗周祁彪佳李邦華王思任以詩文
氣節相孚尋調廣信府丞致仕歸生平輕財重義霑
漑三黨卒之日赴哭者聲震里門 續志

荏啟芳字叔開崇禎辛未進士授海陽令時海寇劉香
老猖獗啟芳以計擒其黨林龍角周瑞備杖斃之更
出奇助督府平香老等忌者奪其功落職歸益讀平
生所未竟書披衣挑燈達曙不倦著有類海策畧諸
書今多散失無全帙子陵見文苑 通志

蘄水縣志

卷之十

宦蹟

夫

南有臺字南山以舉人授句容論講學課士俱有程法
崇經術砥礪廉隅崇禎甲戌捷南宮授諸暨令時當
明季撫字保惠體卹多方擢紹興府司李斷獄明決
民無覆盆調東昌府未幾陞南戶部員外度支部課
潔已奉公尋陞郎中致仕卒於家子州士庠生宏士
縣丞

黃耳鼎字澹巖崇禎丁丑進士幼好學丙子應順天鄉
試道逢老人哀泣問之乃以寬鬻女耳鼎紆途三日
傾囊贖女歸之後試期弗顧會棘闈火改期再試遂

登順天賢書丁丑聯捷南宮第三授中書秩滿召對
稱旨擢廣西道御史彈劾不避權貴巡按陝西值闖
賊破都城耳鼎赴江南尋卒 通志

周壽明字天格崇禎丁丑進士十歲通十三經以解元
聯捷爲臨海令鑿東湖注大河長三里許環衛台城
寇不能犯衛軍三千苛糧酷民激則走海廼痛陳軍
弊撫軍立委勘兵胥免規避者從重法軍始帖然後
海門倉均里平徭值旱免袒禱雨民築喜雨臺攝海
甯天台篆別歷興除計察三邑廉能第一調曲周三

新水縣志

卷之十

宦蹟

十七

月召對稱旨擬擢吏垣都城陷遂歸入山

國初徵起壽明瀝陳親老終養親喪執哀盡禮畢生貞介
自守足跡不涉城市著敦和堂集未刊子構國子學
正梓舉人材桐楨庠生有學行孫節周另傳 叅續志

畢十臣字恒泰崇禎丁丑進士授慈谿令適歲饑邑有
積困者姦人乘釁坐以閉糴聚數百人操挺刃圍其
舍時變出倉卒丞史不知所爲十臣曰此欲行捨耳
卽命二執杖者一門豎乘輿至圍所叱曰若等將作
亂耶抑止爲饑求貸穀耶如作亂卽縛我去如止爲

饑何不先告我命藏穀者借爾等乃敢如此衆皆俛
伏杖其倡首者二人餘皆散去其定亂之敏決如此
行取奏對稱旨擬擢省垣改福建道御史都城陷遂
歸杜門不出日以課子訓孫爲娛著有說書去存一

部續志

高宏基字元開崇禎庚辰進士司理大名值歲饑捐俸
市牛種給民山東梟賊米玉逼郡諭以禍福尋就招
撫時流離初復民苦俵馬費重宏基白直指疏請暫
行改折郡人德之

通志

蘄水縣志

卷之十

宦蹟

六

官撫極字建之太常卿應震次子以拔貢再任貴陽通
判駐畢烏有捍衛功畢烏人肖像祀之陞平越守忽
苗帥藍二率萬衆圍城七晝夜撫極力守禦之伺其
懈以壯士七十人夜襲賊營擒藍二餘散去以功陞
太僕卿致仕歸

通志

姚明恭字崑斗萬歷己未進士由庶吉士授檢討歷仕
文淵閣大學士加太子少保戶部尚書其制誥之詞
有曰風規澹遠宇量端宏格德明而成士遜王旦謨
弼之心繪民隱而省規條李沆公忠之德祖子鶴父

光盟俱贈如子官居相位一載歸第居恭爲劍州牧
作書戒其潔已愛民虛心聽獄嚴胥役禁家奴居里
中亦能尊賢納善蘄之漕米先從蘄州允軍去會城
遠無彈壓者軍旂肆爲科派里甲苦之爲言於上臺
改允會城民甚賴焉會鼎革旋卒黃之九屬數百年
來居相位者惟明恭一人而已 叅舊志

郭原善字復初原理字成初故宋大理評事茂之裔也
洪武初嘗身翼父母避難後歸鄉殫力經營興復舊
業原理以人才舉爲南京戶部主事原善生子闕才

蘄水縣志

卷之十

宦蹟

九

猷拔萃永樂初以人才選舉任南京主事闕子四原
理子六人今郭族稱至盛云

按舊志自南唐陳起至明姚明恭止共入宦蹟者
五十一傳計五十三人至郭原善係洪武時人不
知何以編列明季
今仍照邵志附存於此

國朝

饒應元字善仙明崇禎庚午舉人順治中令溧水天資
長厚而事有執持妖婦曹氏邪術惑民應元摘其姦
申請殲之編徭役立排丁法俾民無偏重偏輕之累

江南
名宦

李生美字伯純弟果字伯徽順治丙戌同舉於鄉丁亥
生美成進士授德安令清操勁節饒有胆識草寇負
隅奮欲勦之同寅不可生美曰食國家祿膺民社任
豈懼一死耶毅然領民兵摧破之以勞致疾而歿果
令洪雅處蹂躪之後以辟土踐毛爲任招流亡修城
葺學整理一切廢墜丙午分校稱得士勤勞十載歿
於官後從祀鄉賢 叅續志

何之旭字山夢爲人英爽卓犖有胆畧饒文才順治十
五年由拔貢授德化令值兵燹之後民憊俗弊寇燼

蘄水縣志

卷之十

宦蹟

三

屢燃之旭蒞任後開誠竭衷榜示曉諭緝柔撫字禁
暴戢奸邑有起色作聽事堂題曰不侮鰥寡不畏疆
禦不生事以擾民不懷私而忘公德人遂呼爲不四
堂蒞任九載清風兩袖著白雲六編計十四卷分六
科皆治德化上下文移因事制宜動見本末洵濟時
之良吏也

程維伊字懷人順治丙戌舉人授慶元令邑自兵火後
公署久蕪蒞土者率僦民居如傳舍維伊至謂無以
坐堂皇肅觀瞻失建官體乃集衆議建復之民鮮春

糧維伊授麥種導植以補不足邑食鹽聽民自買輸
課澁臺禁姦商漁利運賣之弊修葺學宮纂修慶元
邑志復捐俸置學田以贍士子丙午分校鄉闈得士
六人皆名雋而平湖陸文清公隴其尤爲理學之宗
一時稱爲得人後致仕歸著有積雪樓稿松源彙編
若干卷未梓

張邦福字嚮五順治戊戌進士由主事改授紹興府推
官精明練達摘發如神訟牒悉置內署勾訊之下情
僞立剖吏不能爲姦人誦公明去紹之日爲立郭山

蘄水縣志

卷之十

宦蹟

三

書院郭山其別號也歷官五城兵馬司乞歸居林下

端巖養重子萬選舉人有文才早逝

參浙江
名宦志

王保釐字東郊順治戊戌進士性孝友溫厚和平與物
無忤令通江縣修城垣建學宮爲政務平恕不尙苛
刻民皆戴德後陞常州府通判

通志

李成棟字雲浦順治己亥進士爲樂昌令畱心民瘼廉
介自持懲姦宄恤窮困置義倉立書院善政累累遷
雅州牧尋告歸從容里社無軒蓋之習里人多賢之

卒祀鄉賢子垓另傳

通志 按通
志作李棟誤

南之傑字偉公由選貢順治辛丑授利津縣丞署萊蕪令值兵燹後多荒田積逋病民之傑力請於上得除荒田三千七百餘頃蠲積逋二萬一千餘兩民獲以甦康熙四年改定海丞歷四年以績陞昌黎令未赴丁外艱歸服闋補長山令邑漕糧數百石例輸德州去邑五百里費數倍之傑令民就買以兌民甚便之告歸邑人攀轅弗忍舍去子夢班令葦亭十載卓有神明之號縣試拔士多鼎甲才艱歸起補武康令未二載調陞淮安外河同知任七載著勞績

蘄水縣志

卷之十

宦蹟

三

聖祖南巡賜

御筆臨米芾字以寵勵之子光發見文苑

郡志

李見瑤字仲崑由順治拔貢授儀徵丞尋署江都令江都稱艷地而實貧瘠民刁吏猾積逋叢蠹不可覩縷又當水陸四衝郵騎如織城下衣帶水乃漕運要害見瑤率民夫日夜挑澹南北交馳方員並畫常於輿中挾紅黑二筆運腕如飛凡承讞

欽部大案無不報可後以失察屬吏去官歸家篤孝友之行爲宗黨法孫美中舉人賦姿穎敏著有春秋闡幽

講義

南仲字岷瞻一字懷劬父有恒髫年工詩文為名諸生
早逝時仲甫一歲恃母陳撫教成立以順治年選拔
授澄海縣令澄海濱海巖疆又值兵燹之後仲下車
振興百度加意撫綏不期年而獷馴逋歸遂成樂土
及解組歸里士民攀轅遮道後猶思慕弗忘子岡另
傳

徐伍宗字子亢三餘孫由康熙十六年廩貢授彝陵州

今改宜昌府

訓導署興山縣篆值吳逆未靖招撫流亡卓

蕪水縣志

卷之十

宦蹟

三

有政聲歷遷益陽祁陽後陞石首教諭俱捐俸修葺
學宮課生徒多所成就致仕歸里方巖端重言笑不
苟雖接童穉必以禮年七十一歿子源舒作枚源遠

師齡另傳

參郡志

畢友宜字見次少有至性父沒後每試藝必焚香告墓
所康熙己未成進士知建甯縣除積弊杜請謁分校
鄉闈得士稱盛其邑人士嘗請安溪李相公光地為
文以壽有曰以名進士為名吏持大體如山岳之不
移負大才如江河之莫遏經猷恢擴皆本文章得士

得民爲循良最以疾告歸杜門訓子當事罕識其面
後從祀鄉賢孫封基素性安靜立身謹飭爲巢縣令
後嗣列明經賢序者十餘人曾孫從德從升俱登賢
書本郡志
恭新增

劉同向字枝五由康熙辛酉舉人任新化諭訓飭多士
以窮經力行爲務修葺學宮皆捐俸以倡之弟子北
面請業雖嚴寒酷暑無少間秩滿陞永州授新士思
慕弗諼請祀名宦至永州諸邑弟子列郡庠而遠未
至者歲試之期悉召至而飲食教誨之第其文之甲

新水縣志

卷之十

宦蹟

十四

乙由是士樂集其齋雖盤堆首藟坐客無毡晏如也
年七十一歿於官永士思之亦請祀名宦康熙五十
九年從祀鄉賢子自拔另傳

徐廣淵字伯志康熙戊辰進士令廣宗縣卽古沙邱地
南近漳水故堤卑狹廣淵慮不足障禦稽於衆謂無
患忽漲堤決城不沒者三版萬戶震動廣淵痛哭籲
天願以身填洪波陡平丈餘水退卽日加築身親畚
鍤延袤數十里居民安堵名曰徐公堤邑多陋規歲
耗民財三千餘兩悉行革除宛平王相國熙聞而嘉

之擬薦卓異以疾卒於官年四十有九
胡理由武昌學中康熙庚午舉人歷任澧州安陸廣濟
學官丁酉聘河南同考秉鐸以來克盡師儒之道養
育人才增光庠序載廣濟名宦子攀選廩生學行素
優前令汪歛給匾獎之

楊仁迪字惠升由拔貢中京闈房魁出趙恭毅申喬門
仍以選拔教習令嶧縣嶧故土瘠民貧家無隔歲儲
仁迪多方區畫邑有起色訟者呼至階下立判曲直
民咸服以爲神簿書之餘加意文學著課士偶抄訓
後人皆惜之弟仁復縣丞有幹濟尙俠義

蘄水縣志

卷之十

宦蹟

三五

士置義學提名宥王之嘗自爲文以示程式在嶧六
年頌聲載道年甫五旬竟歿於官仁迪篤於友誼歿
徐源舒字崑淳康熙壬午亞魁爲人落落豪邁有治才
八上春官不第授零陵諭零附郡有重鎮員弁多擾
庠籍有孺生儻俟無知源舒到官後諭士子以禮自
守名行伍與之約誠勿再行滋擾於是弁丁斂跡不
敢犯命孺生習威儀言辭又爲請於學政於試卷面
註明孺籍分別考試以昭造就至意又捐俸修葺學

官程課士子不計脩脯且割已俸以周寒士黌序大
振雍正五年遵例保舉生員湯錫遴蒙錄用巡撫布
蘭泰訪咨風俗條陳利弊凡萬餘言布嘉納之以疾
乞歸里居二十載鄉飲正賓三次前令葉爲舟造廬
請修縣志辭復請鄉飲辭因贈以南州繼美匾其閭
年八十一歿於家孫與佐郡廩生能文早夭

邵志泰
新增

周節周字成菴由舉人任道州學正振興庠序整飭士
風每事必反躬自檢學署有敬一亭嘗於暑月置卧
榻於此有貧生爲族豪誣以盜葬祖塋州牧委勘豪

新水縣志

卷之十

宦蹟

三

進暮金求訊免勘節周叱曰此何地敢二心以服官
乎詰旦往曲直立判回署但見其亭摧折榻已齧粉
乃喟然嘆曰向若不畏四知當與是榻同盡矣人欽
其有守後以內艱歸遂不仕子象晉篤於孝養爲文
縝密有理致以庚午舉人任東湖教諭兄郁燦歲貢
生姪象豫丁卯舉人俱品孚人望有學行

邵志泰
新增

王國英字紫儲兄弟有六俱著聲庠序以精書法名里
中而國英敏練條達才學素孚人望雍正五年由增
生舉孝廉方正

世廟召對稱

旨卽授宛平令於是任宛七載除民辦羊草之累罷西山墪夫之役代完被水積逋二千五百有奇循聲卓卓怡賢親王深器重之嘗稱之於朝雍正十三年

特簡南雄郡守 陛辭之日蒙

恩賜御書墨刻紫金錠香珠貂皮等項到郡大吏皆稱其爲王宛平也尋擢兩廣鹽運使以疾致仕

徐作枚字民樞舉人沉毅縝密篤學尙古出同考官宜興儲右文之門康熙六十一年總河陳鵬年奏請各省

蘄水縣志

卷之十

宦蹟

三

候選人員曉暢河務願効力者赴工作枚捧檄赴袁浦次年鵬年卒調發北河由是累著勞績署歸德通判及上北河同知南河督齊蘓勒北河督稽曾筠交疏保授兗州府黃河同知雍正七年二月七日引

見奏對河務指畫形勢極蒙

恩賚御書墨刻貂皮諸物有加到任後益竭心力估計工程不浮不刻各汛堡置小鐘夫給絮衣水發則鳴鐘集救隄少滲先以絮衣塞之孟家樓大隄外月隄積水浸沒民地爲開涵洞公私便之是年秋戴家樓水發

平隄雷雨交作勢幾潰役夫驚走作枚疾呼曰我等
守土無可去之義如不獲願以身塞衆爲之感奮力
搶救獲免其居官實行類如此越二載蘓勒歸弟筠
內拜以舊同舟不相能遂解組携圖書數帙而已師
齡子七辨効力州同署滑縣丞再補湯陰勞勩成疾
乞身未抵家歿於許州

徐源遠字星來由舉人於雍正九年令肅甯甫蒞事卽
捐俸修儒學立義館延師課業士習一新邑刁抗不
法者悉按其狀弊絕風清任二年忽染羸疾已獲乞

蘄水縣志

卷之十

宦蹟

三

身旋歿肅中士民有遠涉黃河送至蘄畱數月不忍
去者其得民心也如此子七旂另傳

萬元常由歲貢任雲夢訓導著六經語約成語便覽四
言博物文藝通攷等書以訓士子年邁乞休士子佩
服不忘歸里後捐墓田立義庄儲義穀族之貧者咸
利賴焉

汪世燦字邦彥由貢生考職州同於雍正十三年在部
挑選發北河効力在工勤敏著有勞績復於乾隆元
年辦送

山陵大差議叙借補宛平左篆辦事勤慎才具優長緣積勞成疾告歸歿年四十有九世燦生平孝友待諸弟友愛曲至篤交誼能文章成均肄業試輒冠軍乃屢躓棘闈遂圖捧檄而才猷未展賚志早歿命與時違惜哉著有如濂隨紀河上吟若干卷藏於家子夢旭癸酉副車

徐立御字從六雍正甲辰進士初令新鄉大吏慮弗勝任密偵之諸務克辦縣有殺人於道者未獲立御禱而往驗屍忽起坐曰殺人者某也語畢旋仆觀者大

蘄水縣志

卷之十

宦蹟

三

駭立拘某一訊卽服

事具行狀

調滑縣有僧被殺未決株

連者衆立御稔其俗多黠少飲博負則爲盜乃密諭幹役給羣黠以博盡繫之來訊羣方譁辯一人獨股慄願受笞察其有異叱曰博小罪耳汝奈何殺人慄益甚其父爲胥欲袒之是夜收父子於內署而釋羣少厥明令幹役趨其家曰某已供僧爲所殺有刀與僧衣亟持出勿累若等其家驚怖遽以刀衣付役覆訊案遂決陞光州牧以總督王士俊薦授東昌守鄰省有以其屬邑武城爲壑者抗不屈卒得保障內艱

服闋補黎平守修城開江建學立廟躬先勞役權鎮
遠減水權舡租商旅稱便晉古州兵備道古近苗疆
時當新闢蒞任後布威信設方畧每戒僚屬謂職有
兵備之責若敢荒怠偷息國法不可假借由是官弁
爲之震肅苗目仇殺大吏議以兵勦力陳止之是以
在古數年羣情帖服然以諳練苗務出入障地歲無
安輅遂致瘴疾卒於官年五十三歲立御弱冠通籍
居官近三十年自讀禮家居外里人罕識其面然其
清名則播於桑梓知身無長物惟耽古圖籍而已初

蘄水縣志

卷之十

宦蹟

三

晉東昌守季父本僊以雲龍牧於乾隆元年春同引

見

賜克食字帖貂皮藥錠至乾隆八年起補黎平守本僊又以

陞授永昌守與之俱

天顏喜甚詢及宗貫

溫諭移時洵臣子不易之遭也第立得武魁有幹材歷仕賴

其贊襄之力乃先歿於黔

以上邵志 國朝總計二十四傳 二十七人

徐本僊字佑倫康熙庚子舉人考選中書雍正六年簡

發雲南以知縣用權昆陽州牧多善政郡有滇池周

五百餘里山河五道橫入有建言會五爲一者將起
工僊謂一河受五倍水勢必橫決多廢民田乃再三
指陳利害當路悟乃止補文山令捐建書院置膏火
田時以報懇加賦爲功飛檄旁午僊獨條陳利弊文
山遂無加賦累委審烏蒙東川重案約九百餘人不
須三木務得實情中有讐口所誣及濫獲邀功竟列
重犯者皆三復供情案無冤抑陞雲龍州牧革井竈
陋規捐軍需馬匹代完民間無着浮糧捐修關坪大
橋民顏曰徐公橋平頭山有神最靈能禍人歲賽會

糜數千金舉火焚之後神降夢於坪尾村再建再焚
之無何普思不靖檄州民一千五百名運米赴軍如
雇募需攤里下三萬餘金民挈家走避僊急止之代
繳夫價五百金備詳不能挽運故得批允民慶更生
焉時大吏以知府保題適丁內艱歸乾隆元年服闋
赴部少司馬王士俊以博學鴻詞保舉奉

諭旨試內閣仍以雲龍州任內保題授永昌守條減公件
歲免銀一千三百餘兩捐修龍泉井通黑龍潭而農
利以溥所轄土司如猛卯抄擄孟定開廠孟連承襲

諸大案屢爲見才者啟邊釁連年不靖僊深謀獨任
定難倉猝不折一矢而邊地以安乾隆八年引

見賜蟒服取道里門建祠置產收族恤隣諸多義舉復之
滇承審邪教波累三千餘人分別查擬定議之日全
活甚衆乾隆十二年晉滇糧道上游悉心委任至十
七年解組歸里引掖後學如不及捐田四十石入興
賢莊築室石雲嘗手一編吟咏自適卒年七十有七
著作甚富成一家言工書人多寶之有曲辰堂詩集
已梓子五立崧由附貢生歷任福建閩清連城建陽

蘄水縣志

卷之十

宦蹟

三

松溪諸邑所至有聲於建陽新設考棚士咸賴之立
蘇另傳立筮拔貢生立象立年俱國學生

奚學標字虎男庠生潛子潛四歲失怙恪守慈訓家貧
力盡孝養嘗慟母桂氏苦節奮志芸窻屢困棘闈益
刻厲教子學標博聞強記嗜學不倦雍正癸卯舉於
鄉奉部文截取因親老以病辭父母歿服闋選廣東
從化知縣潔已愛民每杖一人必爲心戚歲饑請發
倉廩全活甚衆壬申分校粵闈識拔皆佳士後以病
告歸越二年歿子四志燦志煌志照俱負才未遇而

逝煌篤修自好知慕義曷照國學生

潘伊琪字介純雍正乙卯舉人中乾隆壬戌明通榜授
公安諭爲教一本躬行以率之每誡諸生曰吾輩惟
孝弟忠信爲務庶上不負聖賢下不負吾身爾卽制
藝一道乃代聖賢立言須遵先正矩矱若但連篇累
幅月露風雲非所望於諸生也後以舉班截取簽掣
四川東鄉知縣因病乞歸歸三十餘年安士子常以
郵筒往來有疑必質焉老年居無惰容亦無遽色願
養自適年八十有八子紹淳拔貢生紹濂庠生

蘄水縣志

卷之十

宦蹟

三

龍雲斐字田占乾隆丙辰進士原名于飛榜下改今名
性和易家貧好讀書己酉鄉薦入都大司寇勵文恭
延請教諸子及孫輩丙辰捷南宮授浙浦江令調奉
化民有愷悌之誦甲子丁卯兩科分房所取如張世
犖輩皆知名士旋陞渾源州知州兩辦軍差無誤以
年老致仕歷官三十餘年家無長物及歸囊橐蕭然
依然清白素風也子漢文以監生肄業雍學年滿考
職候選主簿未仕歿

岑天構字文堂性謹飭耽書史乾隆甲子舉於鄉乙丑

成進士榜下分發山西以知縣卽用歷署虞鄉號縣
臨晉所在多惠政後實授虞鄉值歲大荒設法賑濟
饑民得以安堵竟因撫字勞瘁得疾歸里未數年歿
嗣子德煖入成均

范思皇字西懷庚午辛未聯捷進士授庶常次年散館
改部用乾隆二十年補吏部稽勲主事勤慎供職丙
子充福建副考官拔錄皆佳士差竣復

命召見萬壽山仰承

天語春溫垂問父母年歲下詢子弟功名真逾分之榮也

蘄水縣志

卷之十

宦蹟

三

是年冬蒙 相國忠勇公及各堂大人保題晉本部
文選司員外郎二十二年復蒙保舉御史列名引

見着以御史記名十一月奉

命提督福建學政加檢討銜恭請

聖訓諭以振興文教用心作官注視良久蒞任後旋丁父
艱二十五年服闋終母養二十九年服起復赴部以應
補江西道監察御史於三十一年引

見奉

旨回籍嗣於三十六年三十七年兩次恭祝

萬壽俱着加一級回籍歸老林下訓迪後人嘗有句云
帝遣閒身歸畎畝天留老眼看兒孫其安分自得之趣已
流露於筆墨間矣居官十載宦况清貧士林推童年
七十有四子世業丁酉拔貢分發陝西直隸州州同
署理定邊鹽課大使世榜國學生世棻廩膳生世柔
世樂俱邑諸生

劉夢鵬字雲翼 贈文林郎文選之第三子也文選弱
冠入泮性謙退不尚聲華友愛諸弟足不入城市督
學張曾以優行舉生子五皆教之成名長祚禹登乾

新水縣志

卷之十

宦蹟

三五

隆癸酉賢書甲戌明通夢鵬以辛未進士授饒陽令
饒故多奸猾夢鵬緝之力案無留牘緩徭役免浮稅
興學賑饑循聲卓卓後丁艱歸里留心著述乃以強
年遽逝未竟其才所著春秋義解屈子章句已呈四
庫全書館中子光鑣邑諸生

閻國淇字衛瞻由歲貢授保康訓導乾隆十七年赴任
培養士類保康湖北邊邑地險而途遙諸生艱赴鄉
試國淇助資斧勸之觀場文風蒸蒸日上在任六載
告歸年屆八旬前令周選舉鄉飲正賓恭膺 大典

克孚人望

程應麟字耀東儀表威重至性廉潔才識邁眾事祖母
蔡母李克孝李多疾侍藥餌輒累月不寐雖子姪林
立不假手與弟邑庠繼東友愛出入跬步不離中乾
隆癸酉經魁兩薦禮闈乾隆二十六年挑選一等分
發直隸試用知縣時逢

上幸木蘭麟奉差委至密雲潮河見上流浮漚謂從人曰
連日陰霾浮漚者水汎也可速渡否將誤越次趨渡
登北岸而浮橋官渡盡爲衝波漂去諸辦差者皆爲

蘄水縣志

卷之十

官蹟

三十六

水阻南岸由是自密雲至古北口三百餘里道路差
麟獨承辦無貽誤黃河水決需秬稽急麟奉委任邱
買辦十五萬嗣又益十萬麟惻念民力維艱多增其
值示出民輸恐後不數日報竣委審疑獄多所平反
景州饑賑錢米必親核村民被胥役朦蔽者引之升
堂而撫給之其體恤民隱不憚勞瘁類如此二十七
年春

上南巡至趙北口蒙

恩賜荷包一對綵緞一疋旋因造密雲潮白二河浮橋竟

以勞歿於密上官聞之多惜其才未展也子六皆能
文奉錫斐然俱庠生龍然優廩生清才卓犖尤工書
法屆歲薦期旋逝

以上新增宦
蹟計九傳

宦蹟補遺

石三復字懷白生平坦易與姪凌雲以文章孝友相期
門內雍睦登萬厯癸酉賢書甲戌會副留部觀政旋
補授正定府同知厯任數載署府篆事以慈惠清白
見稱士民戴之年七十六致仕歸長子中璞任長洲
主簿孫永錫由貢生考授縣丞分發直隸効用未幾

蘄水縣志

卷之十

宦蹟

三十七

以母老告歸延師取友惟教子弟以讀書爲事

駱驕字公驥順治辛卯舉人幼穎悟爲文原本經術不
事浮光掠影之談初授潛江司鐸約諸生修講倫理
務以孝弟爲先課制藝力追先民潛江人文蒸蒸日上
起任三載陞廣西平樂府富川縣知縣縣山高水淺
有四十八窰屢不馴驕蒞任勦渠魁釋餘黨民皆安
堵隨陞平樂郡守赴任三月丁艱歸足跡不入城市
者十有餘年歲時伏臘與二三父老敦桑梓媻睦之
誼教子姪輩以孝弟力田爲本故子孫皆能守其家

法焉

嚴繼陵字星占康熙丁酉舉人雍正癸丑成進士選襄垣令襄晉瘠壤士樸民勤稱易治陵平易近人有孚惠德愛士恤民出於至誠凡承讞訟獄務曲折以得情蒞襄九載乾隆六年適屆編審戶口期陵陞擦威宜風清弊杜襄人感戴弗諠

何御龍字子乘幼穎悟富文詞中雍正乙卯鄉試乾隆丙辰捷南宮八年癸亥選直隸大城令才識敏鍊操守廉潔克稱其職一相沿陋規生男女有稅龍詳請豁免民戴其德歲荒爲捐俸賑饑多所全活十一年以病歸里惟以詩書孝友督子姓敦宗睦族至今賴之

畢志璜字姜綸性端愨刻苦勵學中乾隆戊午舉人乙

丑會試以第三名魁禮闈歸班候選邑令葉延請掌教蘄陽書院生徒彬彬稱盛屆期選授廣西義甯知縣蒞任後惟以惻怛慈愛爲懷士民稱便公庭闕若無人簿書之暇吟咏自適以年力就衰歿於任子庠生儲源扶櫬歸里囊橐蕭然

以上補遺宦蹟計五傳

葉際昌字占祿保康訓導東高之幼子也蚤失怙事母以孝聞性敏而慧詩文秀麗旁及琴棋曲藝無不精絕豪爽好客岡邑名士王一翥歿葬巴河鳳山年久就湮爲之倡修立碑其輕財尙義類如此屢試高等中乾隆癸酉鄉試甲戌薦南宮未第選均州學正訓士文必宗先正理法尤培養士氣不數年而歸均士至今稱之但用財疏侈家道中落從不乞憐於人宦歸後其家益貧矮屋數椽不蔽風雨年七十餘歿其子因家貧宦遊秦中昌歿之日竟無以歛有好義某

宦蹟

蕪水縣志

卷之十

三九

欽其高節欣助成禮及子歸而後窳窳焉

以上蘇志原板

潘紹經字箬舟由進士授編修職先後充國史館纂修

大考京察一等記名山東道監察御史修八旗通志

擢兵科掌印給事中嘉慶辛酉監順天鄉試告歸終

養歲饑鬻產活人無算家居十餘載著有春秋兵志

校異黃赤道經緯圖天學理數蓋輿圖說比事劄言

樂府審音古文詩賦內外集共七十卷兵燬只存二

芸堂詩集

潘紹觀號巽山由舉人官內閣中書軍機處行走充四

庫館三通館分校旋通籍以庶吉士改刑部四川司
主事晉郎中總辦秋審大獄皆歸判讞奏稿多出其
手奏減情輕法重免死案二件改緩改矜定新例數
條加京察一等乾隆五十九年出爲韶州府知府有
惠政安南咨送海盜三十七名惟按誅一情實者餘
皆全活之英德饑民劫奪官米上憲將發兵駢誅觀
親往勸諭眾立散僅罪始事一人在任二年案無留
牘伴送暹羅貢使入都

特旨嘉獎

蘄水縣志

卷之十

宦蹟

四

召見觀於

養心殿復邀

溫諭回任擢浙江道未赴任卒年四十有四著有巽山詩集

子雲水舉人

華豐貞字年占先世本素封好施與家遂落人泮後益
窮從藩吏習簿書餬口上憲閱所辦稿大奇之贈以
資勉就學始感奮思有以自見通籍後補四川三台
令有大姓悔貧壻婚謀娶者亦豪族兩家俱以重賂
求袒並受之給令攜女出堂惟所願往臨審取兩家

金給貧壻當堂斷領完娶觀者如堵無不頌大令賢
明其他惠政多類此年老不耐繁劇改宜城教諭未
久告歸館同邑楊郭二家登賢書捷禮闈者皆出門
下著有四書講義待梓燬於兵年八十有八卒

潘紹淳字樵雲由選拔任當陽宜都兩縣訓導在任培
士氣正文風先後皆稱職俸滿推陞教諭乾隆五十
九年與修邑志孫日朗舉人日熙歲貢日休浙江仁
和縣典史擢杭州府通判

董際華字白齋歲貢任孝感縣訓導在任以教讀爲事

蕪水縣志

卷之十

宦蹟

四

與諸生相接見惟問字談經邑令某以非禮屈某生
華奮與爭辨卒得直老病告歸門生送之有泣下者
范世業字素夫拔貢充四庫館謄錄議敘州同分發陝
西官孝義同知嘉慶年間教匪訐楚境浸及秦中大
吏聚員弁議守禦計同僚皆希上官旨世業獨按地
理形勢指陳要害洞若觀火大吏擯其議不用已而
果如所言賊勢張甚大吏悔使世業往探之返見大
吏述生靈慘死狀語憤激尋有妄傳賊犯某界者大
吏遣世業督兵往禦業至愕然曰此難民也撫慰之

會大雨與難民相依露立林中雨竟一日夜不止霽始散去難民獲全而業以是得寒疾不數月卒大吏率其屬賻之

節錄省志

徐愈敬字近莊由舉人任宜城縣教諭學署居住來之衝向來小貿者雲集其間日完學宮地費壹貫零前任有增至兩倍者敬盡除之在署清廉勸學課士一時出門下者皆立行敦品道光戊子卒於官著有四書講義四書典則讀書要訣未梓

徐立崧字松之由附貢援例分發閩省初委署連城縣

官蹟

蕪水縣志

卷之十

四二

事即創建試院乾隆辛卯科調辦闈事上憲嘉之任歸化時構訟者以暮夜金求袒御之仍直其事任松溪時學宮頽廢倡義新建並置學田三百石勒碑紀之所至矢勤矢慎有政聲

柴承旺由舉人任均州學正諸生假館受業成就甚多時教匪圍城旺與州牧張督士民櫻城固守月餘圍解甲子解組歸壽八十有六

郭文琇字郁亭由歲貢補利川縣訓導在任四年縣有猾吏爲通邑患諸生連名控學爲移縣置之法士民

德之有塾師以短脩控主人廉知主人非慢師者捐
十金以主人名致其師解組後優游林下十年壽八
十有六

郭應台字雲階由舉人借補漢川縣訓導在任十二年
惟事筆耕寒畯入學不苛索印結極貧者院費捐廉
助之解組時受業百餘人攀轅祖餞無不泣下

徐宗岳字一峯陝西試用縣丞有膽畧嘉慶丁巳關中
教匪猖獗大吏督兵征勦岳奉委辦理糧臺一日大
營失利師多潰惟岳隨藩憲朱公勲堅守不出又委

新水縣志

卷之十

宦蹟

四三

解軍餉十萬中途遇寇計匿之絲毫無失庚申寇平
奏委賑恤災黎無濫無遺上憲廉其能委署寶雞縣
事復調省辦善後事宜邑士民留之不克道餞者數
十里因勞成疾告終養歸日惟怡情山水俗事一無
所問庚申卒於家

聞盛榆由副榜以通判用歷任子牙河通判河工效用
十八年蒙上憲獎賞卓異調署大城交河等處知縣
居官清慎解組時士民餞送口碑載道旋里後囊橐
蕭然年八十有二

彭述字曉川乾隆乙酉舉人由大挑分發山東歷署鄒平海陽等縣多著循聲旋任棲霞縣事廉明勤慎聽鞠無枉撓民咸欽服興學校課期進士子於庭與講明文藝科歲試手第甲乙遴拔真才士益奮文風遂蒸蒸日盛在任幾十年囊橐蕭然解組歸士民餞送有泣下者年七十六卒於家

陳光詔字金門乾隆己亥舉人由大挑分發湖南歷任長沙湘陰永定平江辰州等縣官至武岡州知州清慎勤明所至多惠政任平江時適有教匪滋事詔擒

斬水縣志

卷之十

宦蹟

四

獲渠魁數人大寮欲毖後患諭呈逆名冊卽爲保舉知府詔不忍殘數百人之命以博身榮遂焚冊力辭保舉餘黨卒爲良民他如倡建書院均平賦稅諸政楚南人至今言之如前日事年七十致仕八十卒於家

徐立階字吉升由舉人授崇陽縣教諭得諸士心有廩生戴膏澤者家貧不能應試階器之引至署盡心教誨後果登賢書觀風月課遴拔皆真才以大計卓異保知縣旋告歸纂修邑志人無間言著有睡亭詩集

何宗禮號敬齋由舉人任崇陽教諭其地風氣剛勁士
有緣事被黜者召至開導其人卒改行爲請開復邑
人遂漸服其教頌曰伯起重逢

王壽榕原名於斯由附貢捐通判分發浙江歷署湖州
嘉興紹興等府通判補温州通判興水利編保甲弭
賊盜善政畢舉攝平湖泊篆前令林虧官項鬻女以
償榕捐俸贖歸撫爲己女以獲盜功擢直隸州知州
仍發浙江試用委署歸安長興鎮海等縣事積年難
辦之案大吏悉委之以承緝巨奸未獲蹶復起帥中

新水縣志

卷之十

宦蹟

四五

丞奏補海甯州知州修書院興學校築海塘惠糶緩
征皆愛民政越三年陳情終養餞送有泣下者

徐陳謨字迪皋由進士選授四川東鄉縣知縣時東鄉
文獻散佚邑乘闕如謨蒐輯成書捐廉付梓旋率邑
紳士重修

文廟城垣衙署倉廩百廢具舉羅軍門思舉未遇時以非
罪罹縲紲謨器其才言於大吏卒出之不十年羅以
勦賊立功歷官至軍門感相知之深累函相慰勉會
大吏欲量移要地鄉民踴躍軍門乞代畱者數千人

羅商之大吏乃止以故任東鄉幾十年軍務竣叙勞績調署忠州直隸州陞補眉州直隸州其政績一如在東鄉時積勞成疾卒於官時年六十有八

蔡紹江號曉沙山進士授戶部主事改刑部西川司主事陞山東司員外郎充則例館纂修官部曹廿年勤謹奉職且文名震都中門下士如漢陽葉相國各琛黃縣賈相國楨其最著者著有周易補說宋名臣言行錄補編學庸章義詠左詩箴漕運河道圖考及古今雜作六十卷晚年屏去辭章專精理學卒祀鄉賢

宦蹟

新水縣志

卷之十

四六

祠子興保舉人

郭受城號瑩齋歲貢博覽洽聞好學不倦任當陽教諭當邑僻處山陬士風未能免俗城誘掖獎勸數月間彬彬濟濟易爲儒雅解任後仍家居授徒足跡不入城市至今評論封翁者咸推重之

楊兆晉字海樓由進士授廣西博白令博案山積抵任匝月舊案結盡有骨肉相爭重貽求袒晉拒之動以至性訟立解歲旱且蝗禱於城隍神應若響調上林令地廣而荒請緩征野無菜色年餘卒於官民念之

如失慈父母焉

潘炳勳字濟堂由舉人大挑二等選長樂縣教諭主講
五峯書院與諸生講求經義兼課詩古文詞邑中文
風日盛邑令彭杏村修縣志考校參訂多與其勞在
任十五年卒著有周易折衷四書經義五峯文集待
梓被燬

蔡紹沆字澗圃補授山西渾原州巡檢居官著循聲有
某姓案經前任詳辦抵填沆接篆後研訊得其實力
爲白旋獲真犯某得釋越數年解餉過大同車覆足

蘄水縣志

卷之十

宦蹟

四七

折其邑令延醫治不數日卽痊詢醫里居卽向被誣
獲釋人也醫驚喜並率妻子拜送於道大令耳其名
保舉猴毛鎮分縣以丁母艱去職在籍終

蔡紹洛字蓮橋由進士歷任山東棲霞陽穀等縣事斷
獄如神吏民畏服尋遷吏部員外郎咸豐初擢御史
多所建白

朝廷嘉納守天津值賊擾後勦撫兼行恩威並濟大吏上
其勞奉

旨以道員卽補卒於官著有帝鑑圖詩子史試帖行世

程度字謹侯由進士分發山東署邱縣知縣旋補朝城縣事城地最遼曠民風亦較悍下車後嚴懲蠹役之擾民者及一切徭役悉除之每於詰奸究時勸以向善盜漸息邑人奉有程青天之名又捐俸倡建書院顏其額曰武陽士子肄習其中助以膏火凡文字評騭處咸翕然服奮然興自是掇巍科者不少後以病假解組歸紳庶餞送者咸泣涕而別

郭用賓字孟寅由庶常改刑部主事歷升至郎中充秋審處坐辦每讞囚五官並用析入毫芒舞文吏稍有

靳水縣志

卷之十

宦蹟

四八

刁難援例折之無敢交致人罪者道光壬寅奏充隨行發審官差竣出爲河間守旋改授山西蒲州守蒲土瘠民貧家鮮儲積歲薦旱捐俸仿常平遺法設義倉嚮飭粥擇廉能士董出納吏役無由侵蝕全活甚衆晉撫兆公稔其才奏調太原守不數月陞冀寧守道歷署臬司三次清查積贖釐剔奸宄一富豪因姦仇殺餌以重金立卻之置豪於法咸豐癸丑粵匪北竄哈撫入奏委令專辦晉省軍務以署臬統兵出守太行駐攔車鎮巡視大小隘口相地築立石堡堡外

壘亂石等身有警以機發之山陡勢高石自飛激賊畏之不敢進逗遇懷慶者累月遂由陽城黎城繞道北據高唐部議以賊由晉來自撫臣以下皆得嚴處誑誤後處之泰然舊雨勸其出山者皆婉謝之優游林下十餘年以疾終

郭沛霖號雨三由翰垣擢詹事府右贊善轉左贊善奉命發南河學習旋奉

旨以道員留南河權兩淮鹽運使攝淮揚道粵逆犯揚州乞援師辭懇激與督帥齟齬劾落職咸豐己未殉難定

新水縣志

卷之十

宦蹟

四九

遠奉

旨復原官

郵贈如例平生著作極富蒐輯成書者惟日知堂文集

詩賦各若干卷未梓

其顛末另詳
葬衣冠碑

畢至號春亭由進士歷官工部主事轉營繕司正郎軍機處行走充道光丁未科會試同考官咸豐辛亥出守漢中府府屬甯羌州歲饑官民不協勢劫城下時至隨舒制軍總辦安徽大營營務處已二年王中丞入奏奉

肯仍回漢中單騎臨屬屬民喜躍相謂曰生佛還矣羌地遂
平定子二衍熿另傳承恩應例知縣

柳先庚號西圃善屬文磊落有奇氣試輒冠軍道光壬
辰科舉於鄉選蒲圻教諭適粵匪近詎當事輒避去
庚歎曰疾風知勁草今正其時安有棄城背君偷生
苟活而可齒於人類者乎守署中不去會大兵追急
賊下奔委權邑篆發倉儲練鄉勇境內大安大憲方
擬保舉會丁艱歸里年餘卒著有西圃詩文若干卷
翟雲章原名景陽由進士任刑部主事派充秋審處總

蕪水縣志

卷之十

宦蹟

五十

辦因公註誤改捐知縣分發直隸署理肅甯縣事結
積案減浮稅抑豪強以賢能著調補獲鹿令未六月
卒於官子麟書諸生瑞書福建試用縣丞

司先榜字蘂薌由舉人任房縣教諭兼主講書院捐助
膏火並捐俸修

聖廟創立賓興推陞武昌府教授望重山斗士林重之

李鶴字夢仙由舉人任通山教諭咸豐年間粵匪上竄
大憲耳其名委理縣事查辦本邑從逆黨與分別訊
鞫除首逆外悉從寬全活無算其有偽職逼賊來往

書信搜出概焚之致仕日紳庶攀送十里外泣涕而別

徐儒模由舉人大挑授四川夾江令甫下車結積案百餘件計除冤棍某閭邑以冰心見日頌之夾邑僻處士少師承肄業亦無專所倡議建雲吟書院捐俸俸膏火延師主講復斂資修葺試院文教大興旋以疾卒於官崇祀名宦祠

李鼇字三山由舉人大挑補南漳縣教諭俸滿保舉知縣分發廣東補饒平令調署南海值髮逆竄擾勦賊

蕪水縣志

卷之十

宦蹟

五一

有功奏陞惠州府知府加陞兵備道奉

旨引見便道旋里終於家壽七十有五孫烜廩生

范德焯字赤亭由舉人選興山教諭訓迪有方解任歸猶有至其家受業者子三長昌梅郡庠生次昌杜府掾屬三昌棣邑增生

胡璧華號崑白由舉人任咸甯教諭所譔平崇紀畧金菊仙太守勒石黃鶴樓秋滿膺薦歷任直隸昌黎汝河涑水縣知縣順德府同知所至多惠政以母老乞養歸同治辛未重遊泮水主講蕪陽書院著有求可齋

集付梓

郭時郁號梅溪由舉人大挑選公安訓導道梗未赴在籍督辦鄉團胡文忠錄其功洊保知州選雲南安甯收到省時適滇回滋擾林中丞委帶兵勇隨馳任所郁勦撫兼施境內安堵旋移提舉黑鹽井修巒宮建書院外並編排石礮爲運鹽者稱便後調永北廳永北向無學田撥稅課充之又以逆回產業作賓興罰緩租課向屬官收今勒碑入公廡不悅服乾隆時有李公官是土多德政士民建祠祀之立郁長生位於

蘄水縣志

卷之十

宦蹟

五二

其中顏曰李郁二公祠及卒遠近叩奠累日櫬歸過安甯士民以次奠痛哭失聲

陳廷安字殿揚附貢四川候補縣丞永甯府石姓兄弟爭產比年訟未決安奉委往訊曉以大義皆感泣遂爲兄弟如初署雲安場鹽大使捐廉建五溪書院延師教讀士林感之

方鳴皋字鶴亭由進士分發山東卽用知縣歷署青城蒲臺補授壽張旋調署武城兼理臨清直隸州加運同銜以同知直隸州陞用凡所蒞任興利除弊頌聲

如出一口嘗撰楹聯於堂自責自勉聯云民稱父母
須盡父母心自問能無愧乎我有兒孫不喫兒孫飯
所特惟以此耳因年逾邁解組歸囊無餘資掌教蘄
陽書院壽八十有三孫廷甲邑廩生

陳廷經字筱舫性剛正不事家人生產爲諸生便以天
下爲任後由詞垣入諫院巡視中南北三城城內有
鐵面陳御史之稱旋辦理團防擢給事中生平經濟
大畧形諸奏牘嫉惡鋤奸雖權貴不避陝撫楚撫皆
以經奏先後避位去江南克復條陳善後事宜一變

蘄水縣志

卷之十

宦蹟

五二

通疆域使呼應較靈一安置勇丁使控馭得法而簡
用武將一條內其畧云誠念軍營出身不通文理而
胥役操大吏之權或偏用武員而緣營干地方之事
以治賊之法治民將來積怨閭閻或竟別生事故執
法以繩不得不重治以罪在該員不能保全勲業盡
棄前功已爲可惜而民間受禍呼籲無門焦頭爛額
之民又罹荼毒不尤可憫乎至稱大學士倭仁不宜
委以夷務直督李鴻章可爲北門鎖鑰陝督左宗棠
可爲西路干城江南督曾國藩雖精力就衰而威望

素著可以保障東南皆言之鑿鑿他如整頓團防變
通營制因亢旱而進直言衛畿輔而擇宿將皆爲

朝廷所嘉納官至內閣侍讀學士年七十四致仕前一
日猶條陳海防要務數月後卒於京師弟廷柱優廩
生性聰穎彬彬有儒行羣推偉器惜年二十二而卒
范忠榘字靜軒舉人大挑知縣分發河南初任閩鄉時
值大難後諸事廢弛榘修葺書院清釐案牘卓有成
績馬營勇潰掠及桃林榘內慎守備外設偵探獲其
魁送營正法民得安堵同治十三年奏補陳畱大吏

蘄水縣志

卷之十

比蹟

五四

稔其能所治事不拘以文法榘益矢勤慎治盜有聲
光緒元年二月卒於官時年六十有三

畢衍熿號漢槎春亭太守長子由庠生歷官四川江油
安縣蒲江知縣性寬厚有治才蒲邑素稱難治措之
裕如適鄰縣教匪蠢動利蒲無城夜劫獄縱要犯火
民房倉猝應之魁就獲任江油兩載有召杜稱會甘
肅亂有大軍駐境內民情惶懼熿親詣大帥營申約
束兵無騷擾調任安縣興學校邑中詞翰茹連爲二
百餘年僅見事值歲旱禱雨輒應夏設粥廠活九十

三萬餘人惟素性坦易會計多疏遂致庫虧卒於官
次巷哭有失聲者柩停錦官城外泣弔者紛紛民不
能忘立祠以祀憲紳飲以資斧得歸骨焉

高士濂原名朗號玉山由進士觀政刑曹遷刑部正郎
調吏部掌考功司印旋授陝西道侍御幼純篤家貧
力學通籍後風骨嚴峻朝野憚之歷充秋審查倉監
試諸差措置裕如嗣因母疾乞休居保定親侍藥餌
四十餘日無少懈母歿哀毀骨立旋以疾卒著有萬
松堂時文養拙堂詩鈔行世

蘄水縣志

卷之十

宦蹟

五五

蔡興槐號植三道光己酉舉人庚戌教習由內閣中書
擢直隸州牧揀發貴州初至黔攝歸化廳理苗通判
值賊退集流亡繕城堡請免民半租以蘇窮黎廳邊
境多苗洞素與漢民構釁槐履任檄諸洞酋至剖示
利害皆拜服因令與漢民約手書定界碑置其境等
攝貴筑令會外國主教胡縛理與已革提督田興恕
為難幾成巨禍槐以中外大局所關單騎詣胡所諭
以情理孚以誠信禍得解大府上其績擢知府遂權
銅仁郡時賊踞郡數年槐至募銳卒生擒其魁包茅

仙伍雲炤於山洞闔郡肅事

聞賞花翎以道員留黔補用捐俸買穀數千斛付民播殖
旋調黎平復調鎮遠均有政聲有匪徒高某詐爲天
柱令苛斂民錢槐廉知縛斬之逾年移守貴陽時黔
中軍書旁午槐受篆詣大府條陳數萬言多所施行
會賊薄城下境內裹糧避難者麇至大吏將塞闔以
守槐曰糧不久必無城民無依必附賊啟諸門納之
賊宵遁卸篆後奉

旨督辦教民案件先是教民與漢民釁端百出槐遇事持

斬水縣志

卷之十

宦蹟

五

平隨機利導數年積贖一清旋奉父諱徒跣回籍服
闋以母年高請終養掌教府縣書院尊卒年六十有
二子二長卿雲榜名榮莖癸酉舉人內閣中書次鑿
邑庠生

陳慶長號子奉器識宏遠道光己酉科選拔

朝考一等以知縣分發江蘇歷署昭文華亭青浦縣事補
授元和縣知縣皆著循聲薦升知府辦理水師營務
及江蘇牙釐總局兼後路糧台利興弊除有益江南
軍事金陵克復後糧台餘米萬石長不私取分給軍

民他如辦理沙市淮鹽總局及江南甘捐總局皆手
倡其艱官至淮陽河務兵備道加布政使銜卒年四
十有七弟恩嘉號子政由舉人官兵部武選司員外
郎性慷爽同治時新設通商衙門上憲欲爲保送力
辭不就後陞江西補用道便道省墓卒於家

程葆光號純甫歷署四川秀山彭水縣事咸豐辛酉奉
委往西北馬喇湖地方防堵下車時值髮逆攻陷黔
江西北居民將遷避光曉以大義誓同死守招集各
團勇克復黔江賊遁後教團丁操習期以有勇知方

蘄水縣志

卷之十

宦蹟

七

不以賊去遠因人生懈迨賊被我軍擊敗餘黨回竄
咸豐光督帶團勇親臨沙子場層次布置賊畏其鋒
潛引去西北安堵因建凱轍碑以紀其功

